

(二)

珍珠囊指掌補遺藥性賦卷之三

東垣李 杲編輯 金陵鳳笙濮禮儀重校

玉石部

藥能治病醫乃傳方當明藥品貴賤良毒之異須嘗氣味
酸鹹苦辣辛甘

切以金銀珠玉之貴白堊石灰之賤藥性之良則丹砂
鍾乳氣毒則信石礞砂至於五味酸入肝鹹入腎苦入
心辛入肺甘入脾辣則有溫涼寒熱之異

功力有急緩性質有溫涼

其如朴硝之性急若煎作芒硝性乃緩慢矣

本草之作肇始炎皇

玉石部

肇卽始也炎皇神農氏也本草之爲書由神農嘗百草
一日而遭七十毒始興醫藥相救謂之本草

未言草木之品彙且提玉石之紀綱

倣本草圖經以玉石部爲先而草木之品次之

金屑玉屑辰砂石牀能驅邪而逼鬼祟可定魄而制顛狂
止渴除煩安鎮靈臺明眼目補精益氣依經鍊服壽延長
金屑味辛平有毒處處有之梁益寧州最多出水砂中
得屑謂之生金若不鍊服之殺人○玉屑味甘平無毒
生藍田○丹砂一名硃砂味甘微寒無毒惟辰州者最
佳故謂之辰砂生深山石崖間穴地數十尺始見其苗
乃白石耳謂之硃砂牀卽石牀也砂生石牀上亦有淘

土石中得之非生於石者又按本草石牀自有本條味甘温無毒謂鍾乳水下凝積生如筍狀漸長久與鍾乳相接爲柱出鍾乳堂中謂之石牀人心謂之靈臺金屑玉屑辰砂石牀四品之性主治相同皆可依圖經法鍊服食則延年不老

生銀屑鎮驚安五臟鍾乳粉補虛而助陽

銀屑味辛平有毒生銀屑當取見成銀箔以水銀消之爲泥合硝石及鹽研爲粉燒出水銀淘去鹽石爲粉極細用之○石鍾乳味甘温無毒道州者佳須鍊服之不然使人病淋治咳嗽行乳道補髓添精強陽道益肺家代赭石能墮胎而可攻崩漏伏龍肝治產難而吐血尤良

雷公藥性賦卷三
代赭石用火煨醋淬七遍研水飛味甘寒無毒出代州
其色赤故名代赭石養血氣強精辟邪畏天雄附子○
伏龍肝竈中土也味辛溫微毒消癰腫催生下胞止血
崩

雲母補勞傷兼明目水銀除疥蝨與瘡瘍

雲母石味甘平無毒安五臟堅肌止痢局方有法煎雲
母膏治癰疽惡毒等瘡○水銀卽硃砂液能消化金銀
使成泥味辛寒有毒一名汞畏磁石難產可用催生

治喉風理鼻息功全礬石止漏下破癥結用禹餘糧

礬石味酸寒無毒出晉州者佳化痰止痢攻陰蝕諸瘡
漏煨過謂之枯礬亦可生用○禹餘糧火煨醋淬七次

搗細水飛味甘寒平無毒出潞州形如鷲鴨卵外有殼
重疊者是其中有黃細末如蒲黃者謂之石中黃

朴硝開積聚化停痰煎作芒硝功卻緩硝石止煩燥除熱
毒鍊之須掃地邊霜

朴硝味苦辛大寒無毒生益州初採掃得一煎而成故
曰朴硝再取朴硝淋汁煉之有細芒者謂之芒硝專治
傷寒○硝石味辛苦寒無毒卽掃地霜淋汁煉成者

打破瞳人得空青而依然復舊胎宮之孕紫石英有再弄
之璋

空青味甘酸寒無毒生於有銅處銅精氣熏則生今信
州時有之其腹中空破之有漿者絕難得大者如雞子

小者如豆子治眼翳障爲最要又有曾青出銅處色理亦無異但其形纍纍連珠相綴其中不空與空青功效不相上下○紫石英味甘辛溫無毒專治女子風寒在子宮絕孕十年無子又有白石英治風溼痺安魂魄強陰道黃赤黑色皆不入藥

熱渴急救寒水石壯陽須索石硫黃

寒水石一名凝水石味甘寒無毒出汾州及邯鄲卽鹽之精也治火燒丹毒能解巴豆毒畏地榆○硫黃味酸溫大熱有大毒出廣州治疥蟲鬻瘡堅筋療老人風秘腎臟旣衰煅磁石而強陽道膀胱不利炒食鹽以熨臍傍磁石味辛鹹寒無毒有鐵處則生惡牡丹皮畏黃石脂

能吸鐵補益勞傷兼治耳聾○食鹽味鹹温無毒解州者勝治霍亂痰癖可用吐之

水銀飛煉成輕粉殺諸疥癬善治兒疳石灰風化方爲勝不堪服食可療金瘡

輕粉卽水銀粉味辛冷無毒畏磁石忌一切血○五月五日採百草搗汁調煨過石灰末作團陰乾專治金瘡刀斧傷處不堪入藥

石膏發汗解肌去風寒熱滑石除煩止渴快利小腸

石膏味甘辛大寒無毒與方解石相類須用細理白澤者真治頭痛解肌發汗黃色者服之使人淋○滑石味甘寒無毒用白色軟嫩者佳能益精除熱療女人產難

殺三蟲破癥結胡粉一名爲粉錫斂金瘡淘眼暗銅青銅綠竟無雙

胡粉一名粉錫一名定粉俗名光粉卽今化鉛所作婦人容面者味辛寒無毒○銅青銅綠以醋沃銅上卽生乃銅之精也微有毒不可入藥

吐痰抵痔蜜陀僧兼抹黥斑隨手沒生肌止痛無名異折傷可理并金傷

蜜陀僧卽煨銀爐底也味酸辛有毒○無名異味甘平無毒金傷謂刀斧傷也

硼砂攻喉痺止嗽消痰真有理膽礬除熱毒諸癩痰氣盡消詳

礪砂一名蓬砂味苦辛煖無毒出南番者色重褐其味和其效速出西戎者其色白其味雜其功緩不堪入藥作金瘡摻藥用之○膽礬圖經作石膽味酸辛寒有毒信州有之生於銅坑中採得煎煉而成消熱毒療諸風癰瘰可吐風痰

伏火靈砂辟鬼邪安魂魄明目鎮心通血脉藏泥白堊除洩痢破癥瘕滯精止漏又爲良

靈砂一名二氣砂用水銀一兩硫黃六銖研細二味先同炒作青砂色後入水火既濟爐中抽之如束針紋者成就也惡磁石畏酸水○白堊卽白善土味苦辛溫無毒處處有之採無時

石燕治淋催難產黑鉛安鎮熨蛇瘡

石燕產零陵州形似燕其實石也性涼無毒女人產難

兩手各握一枚胎立出○黑鉛味甘無毒有銀坑處皆

有粉錫胡粉光粉皆化鉛所作又鉛白霜以鉛雜水銀

煉作片置醋甕中密封經久成霜謂之鉛白霜性極冷

熨蛇創傷也創平聲與瘡同

黃丹乃是熬鉛作生肌止痛礬石特生非常熱養就丹房

黃丹圖經作鉛丹又名黃丹用時炒令赤色研細味辛

微溫無毒止吐逆療癩癰傳金瘡良○礬石俗呼鎮風

石味辛甘大熱有毒嚴寒置水中令水不冰性堅硬而

拒火燒之一日夜方解故以擊積聚痼冷之病最良須

眞者必取鵲巢中團卵而助煖氣者方眞乃修真煉丹之藥品

血暈昏迷法鍊廣生花蕊石折傷排膿火燒醋淬自然銅花蕊石出陝州閩鄉縣性至堅硬保金瘡止血局方以硫黃合和花蕊石如法鍊成專治產後血暈去惡血○自然銅味辛平無毒出銅處有之形方而大小不等似銅寶石也不從礦鍊自然而生故曰自然銅也

礞砂能破癥瘕積聚若還生用爛心腸信石可吐膈內風痰倘中其毒促人亡

礞砂味鹹苦辛温有毒能消五金八石腐人腸胃生服之化人心爲血○信石圖經名砒霜信州者佳故名信

石味苦酸有大毒主諸瘧風痰在胸膈可作吐藥用不
宜多服能傷人命若誤中砒砂砒霜二毒急宜冷水調
菜豆汁飲之可解

梁上塵消軟癰通喉噎橫生立產井泉石性寒涼攻火熱
除翳神方

梁上塵一名烏龍尾性微寒無毒凡使須去烟火遠高
堂佛殿上者拂下篩而用之○井泉石性大寒無毒處
處有之以饒陽郡者爲勝得菊花梔子最良

療痼冷止頭疼無遺太陰玄精石安心志制顛狂誰知鐵
粉和鐵漿

玄精石出解州解縣今解地積鹽倉中方有之其色青

白龜背者良味鹹温無毒○鐵味辛有毒取鐵浸之經
久色青沫出可染皂者爲鐵漿治顛狂鐵搥作片置
醋糟中積久生衣刮取爲屑鐵粉能安心志

雄黃能殺虺蛇毒妊娠佩帶轉生男子鍊之久服自身輕
要生女子佩帶雌黃

雄黃雌黃同山所生向陽處生雄黃山陰有金處金精
熏則生雌黃婦人覺有孕以雄黃二兩絳囊盛帶之可
轉女爲男以雌黃半兩素囊盛帶之可轉男爲女雌黃
鍊服久則轉身可入仙家

備金石之品味治病得以推詳

總括上文諸藥悉可對證而施治也

草部上

觀夫天生烝民地生百草人生不無札瘥之常以致病於壽夭草有治病之功用別花苗實腦

烝眾也實卽子腦卽根各有所宜也

菖蒲開心明目去溼痺風寒菊花消溼散痺風主頭眩痛攪

菖蒲一名菖陽須用生石磧上一寸九節者良味辛温無毒○菊花味苦甘平無毒主胸中煩熱明目聰耳

治渴補虛安五臟快覓人參温中解毒性平和無如國老人參一曰人葠味甘微寒微温無毒反藜蘆○甘草味甘平無毒主解百毒爲眾藥之王故號國老反大戟芫

花甘遂海藻

白朮益脾止瀉嘔若動氣不宜蒼朮平胃壓山嵐用米泔浸炒

白朮味甘辛無毒主風寒溼痺益脾胃補虛勞消腫傷寒有動氣者不宜服○蒼朮用米泔浸一宿換泔浸炒乾去皮味苦甘辛無毒治傷寒痺痛溫瘧可發散

生地黄能行血兼止吐衄折傷熟地黄能補血更治虛勞焦躁

生地黄大寒亦治產後血攻心及女人經水閉絕○熟地黄淨洗酒浸蒸兩三次焙乾味甘苦溫無毒熟乾則溫補生乾則平宣熟者止崩漏安魂魄治驚悸補內傷

雷公藥性賦卷三
天門冬鎮心止吐血衄血性寒而能補大虛麥門冬解渴
開結益心肺勞熱可除煩可保

天門冬味苦甘平大寒無毒悅人顏色○麥門冬味甘
平微寒無毒二味並抽去心焙乾用

地膚子車前子除熱去風明眼目能使膀胱水道通菟絲
子巴戟天添精補髓主延年除去腰疼誠有效

地膚子卽落帚子味苦寒無毒○車前子味甘鹹寒無

毒能滑胎止瀉痢○菟絲子味辛平無毒水洗澄去砂

土酒浸一宿蒸過乘熱搗成膏焙乾再入藥方可研末

○巴戟天須用連珠者去心酒浸焙乾味辛甘微溫無
毒除風強筋益力治夢與鬼交